

索源義經。先是義經受賴朝命督諸將滅木曾麿平氏。所至有奇功。法皇深寵之。累進官階。而奏請不由賴朝。義經自喜。頗有矜色。賴朝稍稍忌之。柁原景時以軍監從西師。嘗以軍議與義經有隙。每報事鎌倉。輒陳其驕蹇自專狀。師還。景時先入讒之。賴朝使北條時政至酒匂驛。受平氏俘獲。義經不得入見。因大江廣元以訴情。不報。

收其采地廿四邑。義經怏怏而去。還京師。義經性好聲色。多所漁內。壇浦之役。獲平時忠女。內之。又與建禮門院同舟。人或傳與之亂。毀謗益興。備前守行家者。賴朝叔父也。素與賴朝不協。嘗附木曾義仲。後又與義仲惡。出居河內。及義仲死。乃依義經。賴朝聞之。遣使命義經討之。蓋以嘗試也。義經果不受命。賴朝大怒。命景時帥師伐

義經。景時辭。乃命土佐坊昌俊。佯香火于南山者。僭兵入京。襲義經堀川第。不克。昌俊遁入鞍馬山。山僧縛致之。義經斬之。賴朝大喜曰。殺我使也。兵今有名矣。親帥師西上。次于黃瀨川。義經至法皇宮。迫請討賴朝之詔。法皇將許之。右大臣藤原兼實議曰。追討之詔不宜輕下。請勅賴朝曰。義經有罪。當致之鎌倉而誅之。不宜擾輦下。

也。苟罪未至死。宜釋纖芥之憾。全懿親之恩。戒勅如此。而不奉詔。則處之違勅。以聲其罪。恩威並行。國憲益張矣。不聽。遂賜院宣。義經將避東兵於鎮西。以圖事。與行家等帥騎三百至攝津。攝人多田行綱等率兵要之。義經擊破之。航大物浦。值颶。與行家等相失。行家奔和泉被殺。義經乃散軍竄于芳山。山僧聚徒攻之。義經窘迫將自

殺佐藤忠信請留拒敵。義經乃分甲士十七人屬之。自與十余人乘間逃。賴朝聞義經西奔。還師。奏請諸道置關。物色義經甚急。芳野人獲義經。侍妾靜于山中。傳送鎌倉。靜方娠。既而生男。賴朝奪而害之。然後縱靜。義經既出。芳山入談峰。再赴京師。度西國不足濟事。變貌爲行者。以奔陸奧。藤原秀衡城衣川而寘旗。賴朝遣使諭秀衡。

殺義經。秀衡不從。

後數年秀衡卒。其子泰衡殺義經。獻首函於鎌

倉。賴朝謂泰衡擅殺吾弟。興師滅之。

是歲有金色蛇見春日

山。夜春日山有光。京師雨蝶。鼠齧御衣。大

風。春日山木多僵。

三年。春正月。雷。三月。雨雹。夏四月。春日山

數鳴動。五月。賀茂社鳴動。六月。太白犯太

井。秋七月。遣使長門求寶劍於海中。不獲。

壇浦之役。二位尼抱安徳帝。帶寶劍投海。八月。地震。九月。太白

犯太微右執法。冬十月。地大震。十一月。大

織冠像破裂。像在大和談峰。天下將有大變則破裂。大風雨。

臣世弘謹按。文治丙午丁未。豈非千秋

之大厄歟。源右將殺叔父讐親弟。是其

心不存天理也。堂堂王言。朝使弟討兄。

夕使兄捕弟。是其政不重民紀也。綱常

不建。是非不分。天地於是乎一閉矣。夫

以不存天理之人。當不重民紀之際。何

事不忍而為焉。臣獨怪其志之止於霸

也。劉備漢氏之疏屬也。奮編戶之氓。而

登皇帝之位。人尚與名義之正。右將獨

非帝室之胄乎。使之誅法皇而禪神

器。傲然臨天下。而曰我清和帝之胤

也。比之劉備。尚為血統之近。以右將之

姦雄。豈志不欲之哉。而不敢焉。臣於是

乎重有感于天地之風氣。祖宗之立準

也。若夫漢土。代有放伐。國有篡弑。其習俗所由來遠矣。故疏遠如備。尚得鳴血屬以號召天下。而吾邦則不可爲。爲之則敗。此所以漢土稱我爲君子國也。雖然。乙巳之役。乘輿沈海。寶劍不還。皇室名存而實亡。令禮樂征伐。永自武門出。不可不謂之天下之一大變局也。故文治丙午丁未。臣謂之千秋之大厄也。

臣世弘又謹案。王政之墜于霸府也。其有所由而來乎。佛法奪政。藤氏奪權。文弱奪人心。而國之本色盡矣。然政權形而下者也。人心形而上者也。形而下者可以奪而取。而形而上者不可以奪而取。是以及王室文弱之極。天下之猛士本色不滅。桓桓如虎。思得英雄而爲之用。霸府於是乎不得不建也。源奧州父

子創之業。而右大將繼之統。兵馬之權。竟歸鎌倉。而生殺予奪亦隨而移矣。非源氏巧於得之。而王室之巧於失之也。諺云。出船之喜。入船之憂。方文治之丙丁。平氏既殲。鎌倉方興。在右將則屬揚揚得意之日。自王室而言之。將大慟哭之不暇也。噫。

後嵯峨天皇

寬元四年丙午

征夷大將軍藤原賴嗣三年。鎌倉執權北

條經時。三月以後時賴代。

寬元四年春正月朔日有食之。己未。帝傳位於皇太子。後深草帝之初立也。賴北條泰時推戴。以故在位間尤不敢自專。一仰成於鎌倉。遜位之後。二皇子相踵嗣位。長為後深草院。季為龜山院。帝聽政院中廿六年。特屬意龜山帝。及崩。遺詔令龜山帝子

孫世承大統。以長講堂領授後深草帝。充子孫封邑。而北條時宗建議立伏見帝爲後宇多帝太子。自是後深草龜山二帝之後迭承皇統。朝廷之卑替極矣。秋七月。北條時賴逐前征夷大將軍藤原賴經。還京師。初時賴從父光時有寵於賴經。密謀代時賴。賴經預其謀。既而事覺。時賴遣吏卒扼衢路。而以兵自衛。光時度事不濟。剪髮

請罪。時賴流之伊豆。使三浦光村護送。賴經還京師。九月。太白犯太微。執法。冬十月。熒惑鎮星。歲星相犯。鎌倉雷。歲星鎮星太白相犯。十一月。壬午。鎌倉地大震。庚寅。京師地大震。後深草天皇

寶治元年丁未

征夷大將軍藤原賴嗣四年。鎌倉執權北

條時賴

寶治元年。春正月。雷。鎌倉羽蟻群飛。三月。鎌倉海水赤如血。有大流星。長五丈許。如火焰。自東北行西南。有聲如雷。鎌倉黃蝶群集。廣丈許。長數丈。夏四月。日有暈。五月。陸奧海水紅如臙脂。鎌倉有光怪。自西行東。氣如白旗。六月。北條時賴攻三浦泰村。滅之。先是。泰村弟光村護送賴經至京師。相泣而別。潛有迎復之志。及還。其謀益切。

密運致私邑器仗。將作亂。泰村知而不禁。時賴外祖安達景盛與泰村爭權相惡。因告其有異志。泰村妻。時賴妹也。以故不疑。會泰村妻亡。時賴至其家。泰村族人畢集。已而各託治具。更起入內。舉措異常。時賴始怪之。夜聞有擐甲聲。慮其有變。間出而還。泰村驚懼解謝。時賴夜潛遣人偵其家。又遣佐佐木氏信察其動止。見多儲器仗。

還報。益知其有叛計。命嚴守備。泰村懼。遣使謝罪。請罷兵修睦。時賴許之。乃令衆徹備。貽書曉諭。泰村感喜。報未至。景盛率族兵攻之。泰村錯愕。出兵距之。時賴遂命弟時定將兵擊之。縱火上風。泰村兵不能支。舉族走法華堂自殺。時賴奏事京師。令諸國守護地頭。就所在索捕泰村親黨。遣大須賀胤氏等襲殺泰村妹夫千葉秀胤。父子於上總一宮。餘黨無少長皆死。秋七月。有赤氣見于北方。狀如野火。白氣數道交其中。蔽北斗。須臾滅。九月。鎌倉大風。發屋。冬十月。鎌倉地大動。

臣世弘謹案。國之風習必由其祖宗之心術。魯之祖有周公。故俗重禮教。齊之祖有太公。故人尚功利。漢光武崇尚名節。後漢多忠義士。司馬氏以權譎奪天

下代不絕叛臣。明太祖天資鷙猛。好殺功臣。三百年間。朝士有殺氣。嘗持此說以考北條氏之世。益信其然也。時政義時以梟獍之性。欺孤寡以竊國命。子孫雲仍克肖。乃祖乃父。視其君如木偶。而其親戚家臣之謀叛者。亦無代無之。此曾子曰。戒之戒之。出乎爾者。反乎爾者也。

後二條天皇

德治元年丙午

征夷大將軍久明親王十八年。鎌倉執權

北條師時

德治二年丁未

征夷大將軍久明親王十九年。鎌倉執權

北條師時

德治元年冬十一月。熊野新宮火。十二月。富小路殿火。

二年春三月。關東地震。冬十二月。興福寺